



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

Tir Yimiyim

tiryimiyim@aolima

tir yimiyim

TAPAK 3

US mitkar nem linük nungi Afghan nung operation magidaksütsü: PM Khan

Assam nung Hombar nungi nisung lakh asemsem nem vaccine agütsütsü

VOL. XVIII NO. 247 (ADOK 247) DIMAPUR

TENTONÜ (MONDAY)

AAMI (JUNE) 21, 2021

₹ 5.00

COVID-19 Nagaland: Anogo 15 buba taneptsü angur timba

Kohima, June 20, 2021 (TYO): Nagaland nung tanü agi anogo 15 buba COVID-19 puteter dang nungibo taneptsü angur timba liasü.

"Tanü nisung 57 dak COVID-19 putet. Parnokji Kohima nung 23, Mokochung nung 10, Phek nung 8, Longleng nung 6, Wokha nung 4, Peren nung 3 aser Mon, Tuensang o Zunheboto nung kaka (1) lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Maneni tanü COVI-19 puteta alir nisung 143 taneptsü angur. Parnokji Mokochung nung 48, Dimapur o Kohima nung lirer (40), Mon nung 6, Phek nung 5, Wokha nung 3 aser Tuensang nung 1 lir" ta paisa ashi.

Tanü putetertem züngsema nisung ajak agi 24,248 kümogo aser nisung 21,201 taneptsü nguogo, ta Dr Kikon-i ashi.

Taneptsü angurtem 87.43% kümogo aser tang nisung 1,890 anepaludar, ta paisa shisem.

Tuensang nung COVID-19 puteta alir ka asüba züngsema tasür ajak agi 469 kümogo saka parnok 14 bo tanga tashidak ajanga asü, ta Dr Kikon-isa metetdaksü.

"Nagaland nung COVID-19 alitsü akok ta temolung melemi bilemba sample 2,14,966 tendangogo. RT-PCR ajanga 95,435, TrueNat ajanga 59,915 aser Rapid Antigen Test ajanga 59,616 tendang" ta Dr Kikon-isa ashi.

Honibar tashi nung Nagaland nung nisung 3,47,415 nem COVID-19 vaccine indang dose 4,02,778 agütsüogo, ta State Immunization Officer Dr Ritu Thurr-i ashi.

Vaccine agirtemji frontline workers 59,911, healthcare workers 15,756, arishi küm 45 ser temapur 1,38,146 aser arishi küm 18 nungi 44 tsüingda alir 1,33,602 lir, ta pai ashi.

"Vaccine agirtem rongnungi nisung 55,363-i dose anaprong agiogo. Parnokji frontline workers 28,344, healthcare workers 10,365, arishi küm 45 ser temapur 16,653 aser arishi küm 18 nungi 44 tsüingda alir ka lir" ta Dr Thurr-i metetdaksü.

NHRC-i Nagaland o Manipur dang Rongmei aser Naga-Kuki osang meshir

New Delhi, June 20, 2021 (Agencies): National Human Rights Commission (NHRC)-i Nagaland aser Manipur nung Chief Secretary tem dang Rongmei nung aser Naga-Kuki mangatettep indang osangtem agütsütsü atema tetuyuba agütsüogo.

Iba temepishiba ana ya Supreme Court lawyer aser human rights activist, Radhakanta Tripathy-i benokba liasü aser April 24, 2017 nü Kohima nung NHRC-i item onük agizük.

Nagaland sorkari Deputy Commissioner tem aser tanga revenue kettangpurtem nem Rongmei nung agizüksüba indang tetuyuba magütsür, ta Tripathy-i tai tongloksü.

Iba tebilemtsü onük nung Rongmei nung, Nagaland Special Development Zone, Nagaland Land Revenue Act, Intanki National Park, BEFR Act, Disturbed Area Act agizüksüba densema lir.

2007 nungi Nagaland sorkari iba khuret meteta lir saka odang toktsür aser küm 10 tema Cabinet Sub-Committee ket nung iba onük lir, ta Tripathy-i ashi. Paisa iba tesemi Special Reporter ka yoktsü atema NHRC dang mepishio.

Nagaland Home Commissioner-i agütsüba osang atema Tripathy-i telangzüba agütsüba sülen NHRC-i Home Commissioner dang nungi

ano telangzüka meshio. Ajisiaka, tang tashi iba osangji mangu lir.

Iba jagi NHRC-i Nagaland Chief Secretary dang tekaraba nung Tripathy-i benokba onüktem aatema telangzüba agütsütsü tetuyuba agütsü.

Tripathy-isa tanga temepishiba ka nung Nagaland nung Manipur den arrtsüa aliba district tem nung Naga aser Kuki nung tsüingda mepetmesü adokba indang shia liasü.

State sorkari senzüka yutsüba ajanga yimsüing karibo mouteter. Ozüing alema mapa inyakba anentsüla aser tai maketba nisungtemi khuret ajurubatem asoshi mapa inyaksü nungdaker, ta Tripathy-i NHRC dang ashi.

Nagaland Home Commissioner-i NHRC dang iba dak sendakba tatalokba osang kecha angazüka mali ta langzü.

Ajisiaka, Tripathy-i Nagaland o Manipur state tem nung Naga mesüra Kuki nung nem meimchir temeten agütsütsü atema mapa inyaksü tuyuang ta NHRC dang ashi.

Iba atema NHRC-i Manipur Chief Secretary nema Tripathy-i agütsüba shidi yokogo aser iba atema mapa inyaksü shio.

NHRC-isa Nagaland Home Commissioner dang Tripathy-i agütsüba osang atema telangzüba agütsütsü nenshia metetdaksü.

WC, NNPGs-i K.T Sukhalu dang telangzüba meshir

Dimapur, June 20, 2021 (TYO): Naga yimten teloktemi Covid Funds nungi shilem meshizüker ta Education Department Advisor, K.T Sukhalu-i tai tongloksüba ajanga Naga nung aoksakdaksüogo, ta Media Cell, WC, NNPGs-i metetdaksü.

Zunheboto district kübok Sumi nung linük tenzükertemi iba ya meshi ta pai ashiba ajanga Sumi Naga National workers aer talisa Sumi nung tenung menüksüogo, ta parnok i ashi.

"Covid sen meshia agiba national worker aser telok tenungtem Sukhalu-i yimjak nung metetdaksütsü akhanger. Nagaland nung Covid anema inyaker ajak akhümsübur aser telok balala nungi aibelenba züngsemtem pei pei sasep nung merenshitsu aser senji nübertem meyong asü nung meyipa angutsü merangtsü" ta WC, NNPGs-i ashi.

India sorkari agütsüba Covid fund ya nübertem yaritsü atema yokba lir aser National workers ajaki ibaji meteta lir. Iba sen ya Chief Minister, Deputy Chief Minister, Medical Minister, political party tem mesüra kettangsurtem atema masü mesüra tanga mapa atema amshitsü atema masü, ta parnokisa metetdaksü.

Political party aser civil society

tem den Naga nungeri Nagaland sorkar dang Covid funds koma amshir ta asüingdang aser iba yagi sen shitak mamshiba kuli sayur. Anungji sorkari Covid sen agiba miimbangsü atema K.T Sukhalu-i national workers nem tai tongloksür asütsü akok. Pai mapa shitak meinyaktem aser oshimashi inyakba miimbangsü atema mapang shia pai Naga yimten tebilemtsü tetshia arur. National workers nem Covid fund agütsüba osang tejanga pai magütsüetra, Naga National workers aser talisa Sumi nung tsüingda tsükchitep adokdaksütsü atema inyakba mapa ka ta onoki züngshitsü ta WC, NNPGs-isa metetdaksü.

WC, NNPGs nung Naga yimten telok 7 densema lir aser onokia doctor o medical expert temi ashiba sülen anidaka wara madak takok angutsü alizüing lir. Minister, MLA aser India sorkar mapa inyakerem dak alaka tanüingba Naga nungertemi rongsenkettung tsütsü timtem tulu ajurua lir aser iiba ama mapang ka nung K.T Sukhalu-i linük tenzükertem anema noktaksüsa olen jembiogo. Iba ama tensa ka nung linük tenzükere kari dang timtem ajurura iba tebilemtsüji pai abentsü ta parnokisa ashi.

"India sorkar aser WC, NNPGs tsüingda November 17, 2017 nü "Agreed Position" sign sütepa ajanga Naga nungeri tarutsü atema asalentong yanglutsü temeten agütsüba sayur. India sorkari January 10, 1929 Memorandum to Simon Commission, August 14, 1947 declaration aser May 16, 1951 Naga Plebiscite akhümsübur aser item nung ajemdaker tenangzüktep nung sign asütsü. Anungji, K.T Sukhalu-i Naga linük tenzükertemi kodaser yamai mezüingmeshir?" ta Media Cell sangdong nungsa shia lir.

Sukhalu'er kibongi Naga yimten atema inyakba nung shilem kecha magi aser food and civil supplies nung kettangsur ka ama pai non-Naga shishilembartem den tesentaktep ayuba meteta lir kechiyong sensakerem asoshi agütsüba jangotsü samadok, ta parnokisa tai tongloksü.

Tesem balala nung Naga yimten telok kettangsurtemi Naga Army aser Civilian worker temi designated camp balala nung vaccine agitsü mepishibajia K.T. Sukhalu-ibo tashiyim agi vaccine agiba ama meyipzüka jembitsüa akok. Anungji pa dak iba tangatetbaji lira, designated camp balala nung vaccine agütsüba maparen anena atatsüla, ta WC, NNPGs-isa ashi.

Delhi nung arogotem longjemer Covid Care Center lapoker

New Delhi, June 20 (TYO) : New Delhi nung Covid-19 tashidak agi shirangertem asoshi Delhi nung tenteta aliba Northeast pur arogotem longjemer Covid care center ka lapokogo. Iba dang ya Rapha Community Covid Care Centre ta ajar. Rapha tetezü Ibr nung oshi nung ajak aneptsüba mesüra yanglushitsüba. Iba Covid Care Center ya Rockland Hotel nung lapoka lir aser yangi shirangertem nem teyari angati agütsür.

Rockland Hotel ya star hotel tajung ka lir saka Covid agi mokdangba ajanga hotel maparen junga mouteti lia, iba kiburi Covid Care Center asütsü atema arogo nem mulungusa agütsü ta iba Community Covid Center sentong achaayanger Wb.Lanu Yaden den iba osangbeneri jembidang metetdaksü.

Parnokisa anepalua North East state -tem dangia USA nung Pharmaceutical Company ka kibur Balaji den jembitepa Covid Hospital nung amshitsü atema Oxygen Concentrators, Pulse Oximeters, Scanners, PPE

Gown aser Nebulizer amala osettem meshia bener yokogo.

Iba Rapha Community Covid Center nung shiranger atema yipten 100 lir aser iba mozü kidang yariteptsü asoshi tamalen Emmanuel Hospital Association nung Executive Director inyaka alisang Dr.Sunil Gokavi leniba nung bendanga agütsü pur doctor aser nursetem alitsü. Iba Covid Care Center nung shirangertem yaridang amshitsü asoshi nungdak osettem ajak Shanghai nungi bener arubatem lir.

Iba Covid Care Centre ya taoba hopta June 16 nü to semzükogo. Iba sentong nung adener tongtibatang nisungtem rongnung Manipur nungi adoksang Lok sabha MP Dr.Lorho S Pfoze aser Meghalaya nungi adoksang MP Wt.Agatha Sangma na liasü. Tena den arogo tsütsü nungi Council of Baptist Churches North East India (CBCNEI) nung tongti zülur, Dr.Akheto Sema, Asian Pacific Baptist Federation nung tongti zülur, Dr.Vesekhoyi Tetseo (Japan), CBCNEI

Mission Secretary, Rev.Boipu Serto, India Mission Coordination Committee nung Executive Director, Rev.Samaresh Nayak aser Emanuel Hospital Association nung taoba Executive Director, Dr.Sunil Gokavi nungertem den arogo balala nungi sannükertem iba online aser offline sentong nung dena liasü.

Iba Rapha Covid Care Center ya Delhi nung aliba North East arogotem den Asia Pacific Baptist Aid, CBCNEI, Rockland aser Delhi House Society purtem longjemer anepalur.

Iba Covid Care Center nung yabo mozü tsütsülen dang masü saka shirangertem tanüla nung dena tasü itdakja yariteptsü asoshi arogo nung tenzükertemi yariteptsü renema lir.

Iba Rapha Covid Care Center lapokba Rockland Hotel ya New Delhi nung Block B, Chittaranjan Park, B207, Outer Ring Road nung lir aser iba center den mobile number 95600 14155 aser 88104 40451 ajanga tongtepratep sütettsü.

ASENOK MOZÜ KITEM ASER YANGJI TEYARI ANGÜTSÜBATEM INDANG METETDI (SHILEM-V)

Center government-i nübertem anema alitsü asoshi inyakba sentong tajung kaji National Mobile Medical Unit Services (MMU) ya lir. Iba sentong ajanga temang nung timtem liaka mozü ki tonga moutetter atema pei yim aser pei ki tonga gari nung doctor aser nurse-temi mozü bener arua yarir. Iba MMU sentong ajanga tashidakbo tulu masü ser nung tangaleni taneptsü bushia moutet pei kidang shiranga alirtem, menatepa aoba tashidak mesüra memenatepa tashidak wara agi shirangertem, tanur benloksüba aser tanurtem temang anepaluyim, tanur aika mesoi sottsüba aser tashidak putettsü inyakba maparen ajak angati dang ki tonga arua yaritsü. MMU yoktsüba tesemtem, kongsa medical teyari agi junga matonger, item tesemtemji pei state nung nungdakba tesemtem apir state government-i lemteta inyaksüsa lenmang sadema lapokja lir. Iba sentong nung nungdakba nübo, mozü aser osettsüsetem anepalua inyaksü atema Nagaland state nema 2015-16 küm sen lakh 178.96, 2016-2017 küm sen lakh 152.97, 2017-2018 küm sen lakh 114.96, 2018-2019 küm sen lakh 38.42, 2019-2020 küm sen lakh 17.23, 2020-2021 küm sen lakh 75.24 lemsütsü aser 2021-2022 küm asoshia sen lakh 75.24 lemsütsü lir. 2019 küm September ita tashi nungbo Nagaland nung MMU tenet ajanga yimtaklirtem tonga oagi teyari agütsüba osang liasü. Iba http://164.100.24.220/loksabhaquestions/annex/173/AU2636.pdf nung angutsü.

[Iba osang ya Wt.Limatula Yaden, shiba DGHRD, Central Board of Indirect Taxes & Customs, New Delhi nung tang Additional Director General lir aser taoba küm 6 tashi Ministry of Health & Family Welfare, Govt. of India nung NHM Policy Director liasü, lai yokba nungi nübertem ajangzüksü asoshi adoktsür.]

District kar nung lockdown ya anogo 10 benoktsü akok: Assam CM

Duliajan, Aami/June 20 (Agencies): Taruba hopta tashidak COVID-19 tashidak menatepa aoba tajemba ka mekumra, district kar jungjunga shibangtsüsa (complete lockdown) akumtsü, ta Assam chief minister Himanta Biswa Sarma-i Deobarnü metetdaksü.

"Taruba hopta COVID-19 tashidak menatepa aoba tajemba makumba district tem nung anogo 10 atema jungjunga shibangtsü," ta chief minister Sarma-i Deobarnü Tinsukia district kübok Duliajan nungi ashi.

Iba onük ya taruba State Cabinet senden Bodhbarnü

amentsü aliba nung jembitsü aser koba district temnung sa complete lockdown benoktsü, ibaji lemteter state sorkari nüburtem nem metetdaksütsü.

Tinsukia, Dibrugarh, Golaghat, Sonitpur, Nagaon aser Cachar amala district tem nung COVID-19 tashidak putetba ajema makumer.

Honibarnü Biswnath nung nisung 221 dak COVID-19 putet, Dibrugarh nung 217, Cachar nung 175, Golaghat nung 249, Nagaon nung 228, Tinsukia nung 251 aser Sonitpur district nung 295 dak iba tashidak puteta liasü.

COVID-19 tensa ya maneni kasa dang lira, state

sorkari item district tem nung complete lockdown ya benoktsü akok.

Iba virus tesashi menatepa aoba süngzü rakdaksüing mechi Assam sorkari district kar nung complete lockdown ya benoktsü asadanger.

Taoba mapang Kamrup Metro district nung anogo ka nung COVID-19 positive cases ya 1,600 tashi puteta liasü. Ajisiüka yangji tensa kanga tajungba kuma Honibarnübo Kamrup Metro district nung COVID-19 positive cases 199 dang liasü.

Anungji Kamrup Metro district nung complete lockdown benoktsü teimla mali.

Mizoram: Internet majungba agi online class atema km 3 jaja

Aizawl, Aami/June 20 (Agencies): Internet tesendaktep nunga maliba ajanga Mizoram tezülen aliba kaketshirtem study nung kanga mejungi tim atemer.

Mamit district kübok Pukzing Vengthar yimtsüing nung aliba kaketshirtem anogoshi internet bushia kilometer asem dak tema jajar.

Internet majungba ajanga kaketshirtem tatidang aser assignment agütsüba nung timtem ajurur.

"Network majungba ajanga kaketshirtem signal angutsü atema kilometer asem dak tema jajar. Tlangnuam yimtsüing ajangba sülen internet angur.



Iba mechi assignment agütsüba nunga tetsükdaksü ajurur," ta pai ashi.

Iba yimtsüing ya sub-district headquarters nungi kilometer 60 aser district headquarters Mamit nungi kilometer 104 shi pilar lir, kong nisung 500 shi lir.

Ita tetenzüklen Mizoram south tsütsü Siaha district kübok yimtsüing ka nungi undergraduate students tenet tashi online semester tatidang ya internet majungba agi tenem kolak ka nungi agüja liasü.

Parnoki tenem kolak nung sungkum, tarpaulin aser somomo tu amshia ki tilaka yanglu aser aji 'exam centre' ama amshia liasü.

Tzünglu aruaka kaketshirtem tatidang agütsütsü atema aotsüsa akumer," ta village council tir Pukzing Vengthar-i ashi.

Yangji alir kaketshir katia internet signal angutsü atema kilometer asem dak tema jajar, ta shia liasü.

"Online exam agütsütsü kanga tasak lir, kechi aser yimtsüing nung internet mangur.

NSCN/GPRN ajanga asükhu lemsatep

Dimapur, Aami/June 20 (TYO): NSCN/GPRN indang Razou Peyu, Moatemjen Jamir mapang tatsüka shiranga arur June 19, 2021 nü anojungi iba lima nungi pilaba atema Government of the People's Republic of Nagalim (GPRN) ajanga mangyimer, ta NSCN/GPRN indang MIP (Ministry of Information and Publicity) sangdong ka ajanga ashi.

Pa ya Ao Region kübok Mongsenyimt yimtsüing nung lir aser Naga linük tenzükba mapa nung September 30, 2013 nung tenüing zülüoka liasü.

Maneni Maram-Thangal Sub-Region kübok Mayangkhang yimtsüing nungi Razou Peyu, R. Rouba mapang tatsüka shiranga arur June 19, 2021 nü asüba atema GPRN mang ayimer, ta ashi. Pa ya

Naga linük tenzükba wadang nung December 11, 2019 nung tenüing zülüoka liasü.

Tenaprongi masü tashi linük meimba molungsentsü nung Naga lima tenzükogo. Tenati Naga lima atema pei agitsü meblemi shilem balala agiba atema tena tenüing Naga nunger puti otsü nung zülüoka alitsü aser mapang ajak nung bilemettsü, ta sangdong ajanga ashi.

Asür Moatemjen Jamir aser Asür R. Rouba kinungertem den NSCN/GPRN ajanga asükhu lemsateper. Parnok mangyim tejashi nung alidang Tsüingremi temoatsü aser anisüingzük agüjangma. Maneni asür tanüla teti tatem maka tesunep nung anisüingzükjang ta sarasademtsür, ta sangdong ajangasa ashi.

Meghalaya nung ASHA worker tem longkak aiter

Shillong, Aami/June 20 (Agencies): Meghalaya nung aliba Accredited Social Health Activist (ASHA) worker temi par mapa anena June 19 nungi anogo lateta meyui longkak aiter.

State sorkar yimya memelenshiba ajanga longkak aittsü telemteba ya agi, ta Meghalaya nung ASHA Workers Union tir, Mira June Myrsing aser Adviser, Sony Kharjana nati Nongpoh nung June 19, 2021 nü osangbener senden ka nung shia liasü.

"State sorkari ASHA worker nem tagütsütsü tim sentsüh magütsüi mesushiba ajanga state nung Meghalaya ASHA

Workers Union kübok ASHA nung inyaker temi pei mapa meinyaki anentsü," ta Mira June Myrsing-i ashi.

"COVID-19 tashidak wara den raraba mapang state sorkari taila nangzükba atema onoki tangazüktsü kar sayuner, kechi aser ASHA worker ya nisung meimchir dang aser parnoki tepok tazüing nung nübur metenzüktsü," ta lai ashi.

ASHA Workers Union ajanga Chief Minister, Conrad K Sangma aser Health Minister, A. L Hek dang aiben shiogo, saka parnoki akhangba nung teimla mesayur, ta Myrsing-isa ashi.

Assam Rifles temi state nung maparen balala inyak



Dimapur, Aami/June 20 (TYO): Nagaland nung Headquarter IGAR (North) kübok Assam Rifles battalion balalai lenmang balala nung nüburtem den yaritepa arur. Talisa tang COVID-19 tashidak wara agi alima tesem ajunga sünger nüburtem timtema aliba mapang parnoki jang-o-tzü nungi tenzükba lenmang aisü nung sorkar tongzükba yaritepa arur. Yamaji June 20, 2021 nüa parnoki state kübok tesem balala nung sentong balala ayonga agia liasü.

HQ IGAR (North) kübok Assam Rifles, Kiphire Battalion ajanga District Administration, Kiphire yaria June 20, 2021 nü Kiphire jila nung COVID-19 vaccination cum awareness drive ka ayongzükba liasü.

Iba sentong ya District Task Force for COVID-19 aser Kiphire jila nung aliba civil society tem den lungjemer ayongzükba liasü. Iba mapang

nisung 175 nem COVISHIELD dose mezüingbuba agüja liasü. Parnok rongnung arishi küm 18 nungi 44 tsüingta alir nisung 149 aser arishi küm 45 tema alir nisung 26 tashi COVID-19 mozü ya agia liasü.

Iba maparen ya Dr Amos, Herole VCCM (UNDP) aser 7 Assam Rifles nungi Medical Officer temi anir inyala liasü.

HQ IGAR (North) kübok Assam Rifles, Phek Battalion ajanga Phek District Task Force for COVID-19 den lungjemer June 20, 2021 nü Phek jila nung COVID Vaccination cum awareness sentong ka ayongzükba liasü.

Iba mapang jila nung alir nisung 227 nem COVID-19 mozü dose mezüingbuba aser tetsür ka nem dose tanabuba agüja liasü. Item rongnung arishi küm 18 nungi 44 tsüingta nisung 195 aser arishi küm 45 nungi tema nisung 32 tashi mozü ya agia liasü.

Iba mozü agütsüba maparen ya Deputy Commissioner, Phek, Razouvolie Dozo aser 22 Assam Rifles nungi medical team tawabangba kübok agia liasü.

Medical team nung süngojemtsü aser choyongtsü agütsüba densema nüngdakba ajaka iba Battalion ajanga agütsü. Iba sentong takok ngua agitetba atema district administration aser civil medical team ajanga Phek Battalion dang pelaba lemsatepa liasü.

Father's Day anogomung nung IGAR (North) kübok Assam Rifles, Jalukie Battalion ajanga Peren district kübok New Jalukie yimtsüing nung alir nem June 20, 2021 nü teyari balala den COVID-19 Awareness agüja liasü.

Osang ajanga ashiba agi, parnoki putu menden nung lungjemer Father's Day anogomung munga lockdown ajanga timtem ajurua alir nem teyari agüja liasü. Parnoki

nüburtem dang face mask amshitsü, social distancing yimya aser hand sanitizer amshitsü atema ajungshia liasü.

Kasa mapang parnoki nüburtem dang COVID-19 mozü agiba ajanga tajangzük anguba indang tali rajema lemsatepa liasü. Iba sentong nung yimdaklir nisung 43 tashi ajangzükba liasü.

Maneni Assam Rifles, Jalukie Battalion ajangasa sepaitem aser Peren district kübok yimdaklirtem atema International Yoga Day ayongzükba liasü.

Yimdaklir nem Yoga indang posture balala rasaa ashi aser iba yimya amshiba ajanga temang nung tajangzük anguba indanga angatetdakja liasü.

Parnokisa alima ajunga nung Yoga sabua amshiba aser tongtipang akumba indang lemsatepa liasü.

Nüburtem dang temang anema alitsü atema Yoga ya teti

amshitsü ayongzükba liasü. Ajidang masü Yoga agiba ajanga temang nung tajangzük anguba tali angajemdaksütsü mechi, yimtsüing balala nung poster aser banner mesanga liasü.

Father's Day nüngtem nung June 20, 2021 nü Peren district kübok Ahthibung nung alir Jason aser Sophie nati Assam Rifles, Jalukie Battalion semdanga liasü.

Father's Day nüngtem nung Ahthibung nungi adianu ana, Jason aser Sophie nati ajungbena iba Battalion semdanga sepaitem nem sempet agütsü. Tenati COB nung aliba tebutem ajunga nem sempet agüja Assam Rifles dang pelaba lemsatepa liasü.

Jelia osang mesangdongji ajungbena adianu ana yagi Battalion semdanga Assam Rifles dang pelaba lemsatepa ajanga parnok asoshi Father's Day ya balaka liasü.



Taruba hopta tsungda Covid19 menatepba ajema mekumra district kar total lockdown asutsu ta Assam chief minister Himanta Biswa Sarma-i Deobarnu Duliayan nung metetdaksuogo. Bodbarnu State Cabinet senden nung complete lockdown asutsuba onuk benoka jembitsu aser iba osang yimjak nung metetdaksutsu. Assam kubok Tinsukia, Dibrugarh, Golaghat, Sonitpur, Nagaon aser Cachar district tem nung Covid19 positive putetba ajema makumer. (Duliayan, June 20)

Tripura sorkari kaketshirtem nem sen 60,000 scholarship agutsutsu

Agartala, June 20, 2021 (Agencies): Rashtriya Indian Military College (RIMC) indang entrance examination ajangteter kaketshirtem nem Tripura sorkari kum shia scholarship agutsutsu sangoktsuogo. Honibarnu Tripura chief minister Biplab Kumar Deb-i iba osang metetdaksu. Deb-i ashiba agi, kaketshirtem iba military college nung admission agira, Tripura sorkari parnok nem kum shia Rs 60,000 agutsutsu. Covid-19 wara ajanga kaketshirtem shisaliok wadang

tsutsu kanga mejungi kongshiogo. Ajisuka, item tetsudaksu ajak kokteta, kaketshir aikati national level exam nung takok ngua Tripura nem tenung tajung bener arutsuogo, ta Deb-isa ashi. 2012 kum Udaipur nung alir Sauradeep Datta-i RIMC, Dehradun nung azungtsu maongka anguba aser tesuiba anogo ishika tejkadang army officer ka akumba indang CM Deb-iatishia jembu. Sauradeep nem tenungsang aguja Chief minister-i tawa Udaipur nungisa Debajit Dhali-

i military college nung azungtsu maongka nguogo, ta shisem. RIMC den State Council of Education Research and Training (SCERT) Tripura longjemer kum nung anaben iba tatidang achaayanga agir. "Class 8 nung azunger kaketshirtem, shirnoki RIMC indang entrance examination nung takok ngudir, parnok nem kum shia Rs 60,000 scholarship agutsutsu sorkari lemtetogo," ta Deb-isa metetdaksu. Item tanuri takok anguba ajanga state nung tangartem ajungmesotsu, ta pai ashi.

Tripura sorkari sensaker kaketshirtem angati MBBS zungdaksutsu

Gangtok, June 20, 2021 (Agencies): Sikkim sorkari sensaker kaketshir 50 nem MBBS education angati zungdaksutsu telemtetba agiogo. Iba atema Sikkim sorkari Manipal Institute of Medical Sciences den tenangzuketep ka agiogo.

Medical sciences azungtsu jangrar sensaker kaketshir 50 tashi jangjatsü aser parnok Manipal Institute of Medical Sciences nung azungtsu maongka agutsutsu. Sikkim Chief Minister atema Principal Secretary, Jacob Khaling-i iba osang metetdaksu.

"Sikkim kubok yimtsung nungi kaketshir aika lir aser parnoki medical professionals kumnur saka senotsu timtem ajanga mezungteter" ta pai ashi. Sikkim sorkari item kaketshirtem jangjatsü aser Manipal nung angati MBBS education zungdaksutsu, ta Khaling-isa shisem.

Dibrugarh nung shiranger ka dak black fungus putet



Dibrugarh, June 20, 2021 (Agencies): Dibrugarh nung aliba Assam Medical College and Hospital (AMCH) nung black fungus (Mucormycosis) agi shirangewr mezungbuba putetogo. Honibarnu AMCH nung iba ya putet aser iba ya Assam nung black fungus agi shiranger nisung tasembuba lir. Taoba mapang Guwahati aser Silchar nung putetogo. Arishi kum 47 tain 47 tebur ya Lakhimpur district nungi lir aser pa June 15 nu AMCH nung

anepalutsu aniok. "Iba nisung ya kanga junga anepaludar aser doctor telok kati reprangdar" ta AMCH principal & chief superintendent Dr Sanjeeb Kakati-i metetdaksu. May 20 nu Nagaon nungi arishi kum 27 tain tebur ka black fungus ajanga asu. Pa ya Covid19 nungi taneptsu anguba sülen Guwahati nung nija mozü ki ka nung anepalua aru. May 29 nu arishi kum 42 tain tebur ka Covid19 nungi taneptsu anguba sülen temang nungi

timtem adokba agi Silchar Medical College and Hospital nung aniok saka pa dak black fungus aliba puteta liasu. "Pa tenük külen waker liasu meremmerema liasu. Pa ya diabetes agi shiranger aser high blood sugar level liasu. Doctor temi CT scan agi aser ENT professor temi nasal endoscopy agi" ta Kakati-i ashi. Honibar aonung 10:00 ako meta microbiology reports angu aser idanggi pa dak black fungus aliba shia liasu, ta paisa shisem.

Khowai district nung nashi auyar nisung asem tepset

Agartala, June 20, 2021 (Agencies): Deobarnu Tripura kubok Khowai district nung telok kati nashi auyar ta temolung melemi bilemba nisung asem tepset. Iba lendong ya Khowai district kubok Maharaniipur nung atalok. Maharaniipur ya Agartala nungi kilometre 46 shi pila orr lir. "Nashi auyartem pua merenshiba osang angazukli dang, Kalyanpur nungi fire brigade nung inyakertem iba tesem jagi ao aser par asempronlga kumzük. Par asem ya mezung Khowai district kubok Kalyanpur PHC aser Mungiakami PHC anir ao. Iba sülen, GB Pant Hospital, Agartala-i anir ao, kong par asempronlga takum mekumzuket," ta Charan-isa ashi. "Nisung tepsetba atema mejangjaba nisung tamajung anema Kalyanpur Police Station nung ken o ka benokogo," ta pai shisem.

senzua anguba sülen iba tesem nung alirtemi nashi auyar asemji apu. Parnoki par asem dak kanga mejungi azük. Police-i bushisungdangba sülen par asem yagi Khowai district nung nashi auya liasu ta osang angazük" ta Teliamura sub-division SDPO - Sona Charan Jamatia-i ashi.

Nashi auyar nisung asemji GB Pant Hospital, Agartala nung anepaludang saka parnok kanga mejungi yirur aliba ajanga mekumzuketeti suadok.

Par asemji Billal Miah (30), Zayed Hossain (28) aser Saiful Islam (18) nunger ta jangjaogo aser parnok ya Sepahijala district nung Sonamura tesem nungi lir.

Nashi auyatsü tebilemba nung par asem ya Maharaniipur nung senzua liasu ta iba tesem nung alirtemi ashi.

"Maharaniipur nung TR 01 AL 1662 registration number aketba gari ka nung nashi bener

Assam nung Hombar nungi nisung lakh asemsem nem vaccine agutsutsu



Guwahati, June 20, 2021 (Agencies): Vaccination sentong tuluba inyaktsu nukjidong nung Hombar nungi tenzuka anogoshia nisung lakh asemsem nem vaccine agutsutsu Assam sorkari lemtetogo, ta chief minister Himanta Biswa Sarma-i ashi. Vaccination programme tekaraba inyaksangshia aoba kubok anogoshia State nung nisung lakh asemsem nem vaccine agutsutsu. Iba campaign takok ngua agitetsu asoshi district administration temi achaayangtsula, ta CM-i ashi. Video conference ajanga district 34 nung Deputy Commissioners (DC) aser District Superintendent of Police tem den senden amendang Sarma-i health department dang iba mapatong ajaki angateta alitsu asoshi nuber ajak nem osang sangoktsutsu tuyu. Sarma-isa, sorkar tenzükba wadang nung inyakertem nungi tenzuka shishilembartem aser

nuber ajak vaccine agitsü nungdaker ta lephsia ashi. Health ketdangsür kati ashiba agi, June 21 nungi tenzuka, arishi kum 18 nungi temapur ajak nem Centre ajanga angati vaccine agutsutsu. Health department dang vaccination maparen nung inyaker paramedical staff shia nem senzusenbongtsu atema Rs 100 agutsutsu ta ketdangsürisa ashi. Ano külen, paramedical staff nem chiyongtsu shitak agutsutsu asoshi Sarma-i DC tem nem tetuyuba agutsuogo. Vaccination drive kara inyaka aotsu mapatong kubok state tesem balala nung vaccination centre 2,000 dak tema lapoktsu. Tanu tashi nung Assam indang nitsung yongsuk crore 3.30 nungi nisung lakh 53.20 dak tema nem vaccine agutsuogo. Vaccine agir rongnung, nisung lakh 10.55 tashi Covid-19 vaccine tanabuba dose agiogo.

Vaccination programme tekaraba inyaksangshia aoba kubok anogoshia State nung nisung lakh asemsem nem vaccine agutsutsu. Iba campaign takok ngua agitetsu asoshi district administration temi achaayangtsula, ta CM-i ashi. Video conference ajanga district 34 nung Deputy Commissioners (DC) aser District Superintendent of Police tem den senden amendang Sarma-i health department dang iba mapatong ajaki angateta alitsu asoshi nuber ajak nem osang sangoktsutsu tuyu. Sarma-isa, sorkar tenzükba wadang nung inyakertem nungi tenzuka shishilembartem aser

Video conference ajanga district 34 nung Deputy Commissioners (DC) aser District Superintendent of Police tem den senden amendang Sarma-i health department dang iba mapatong ajaki angateta alitsu asoshi nuber ajak nem osang sangoktsutsu tuyu. Sarma-isa, sorkar tenzükba wadang nung inyakertem nungi tenzuka shishilembartem aser

Sarma-isa, sorkar tenzükba wadang nung inyakertem nungi tenzuka shishilembartem aser



TIR YIMYIM YIMOBILEM (EDITORIAL)

DIMAPUR TENTONÜ, AAMI(JUNE) 21, 2021

Ajungshiteptsüba mapang

Tulur tilar, mozü kidang inyaker meinyaker ta mali, tang yabo ajak Covid tashidak tongpang nung nokdaka lir. Atangji, asütsübjibo yutsür shingaia teshiranga meshirangner, anungji nisung ajaki kanga khuretsa inyaksübjabi tashidak akoktsüla. Aji oda, tashidak akoktsüba atemaji mozü kidang meinyakertemi mozü kidang amongtsüsa meshirangtsü merangtsüla aser mozü kidang inyakertemi mozü kidangi taneptsü bushia arurtemji akok tashi aneper yoktsü merangtsüla. Iba telok ana tsüngda ya, tetezü mozü kidang inyaker o meinyaker na tsüngda, kati ka akümtsübutepa aser temeim agi ajungshitepa pei pei mapa nung tamakok maludaktsüi inyaksübjabi kanga tongtibang kümogo. Asenoki yamaji ka tangatetep nung pei pei mapa nung tamakok maludaktsüi meinyakra, ano ita anasemka tsüngda Covid wara ya tesashiba arutsü osang sangdonga lir. Meimlaba mapang, merenemi alidang tashidak tasen aser tesashi agi asenok menep nungji, asenok terata aser tetsübu nung kanga makmakshitepogo. Aji oda, külen government-i ozüng ka agütsür, külen arogoi telemtetba ka agitsüla aser ano külen government-i agütsüba ozüng dang nungibo takangba aser tesashiba yimtak yimteni aser town nung mepusangertemi lateta agütsü dang, tashidak wara agi masü saka tetsübu aser tesempa agi asenok o asenok na kanga timtemtepogo. Atangji, tanga asenok aika mulungjang nung iba tetsübu aser tesempa shisatsüji lir, iba jagi mozü kidang inyakertem karibo shiranger dang nungi tashidak mena tsübu shiranger tonga maor aser ano, mozü kidang meinyakertemibo shiranger masü saka pei kinunger aser tsürabur tasü mang ayuba süngden nung kongshitsüa dena tsübu. Aueribo shingaia marishiyonga ajener ta jembiba amato, joko asenok kanga tsübuokba agi shiranger anepalutsüba purtemi shirangerang tetsübu aser tasü mang anepalua merüktetsür rema yutsütsü purtemiang tasü mangji tetsübu ta, tetsübu agi pei taküm dang kümzükra ojanga ta bilemba shisatsü agi nisungtem rongnung temeim, awashi aser sobaliba mali kümogo. Covid agi masü iba jagi asenok samatsü. Ibaji kodang jungjunga bilemdangdir, tashidak wara tesashi pateka nung ya asenok o asenok na kati ka meyaritep ser lilang nungi dang reprangtepa kazü nung ajungtsü na? Tang mozü ki masüng shiranger ishika amongdang asenok teka agi tua meyaritet nungbo, mozü kidang masem shiranger adenshi nungbo koda asütsü? ta tasüngdangba aika arur. Aji oda, tang mapangba ya kati ka aitsüteptsüba masü saka kati ka ajungshitepa pei pei mapa nung takok ngua inyaksü merangteptsüba mapang lir. Joko, asenok mozü kidang inyakera sang, meinyakera sang, yimten, lokti aser arogo iba tongpang nung ya ka dang akümtsüla. Asenok balaka, itasa ita kecha meinyak kidang dangbo monga melitetsü. Atangji, governmenti relief jang angati lemtsütsüa akok, saka asenok relief jang angati anguba kija jagi taküm melitetsü. Iba tensa tiaji shisadanga tang ama ya asenok o asenok na yaritepa iba tashidak tsübu tongpang ya koktettsü merangtsüla. Tang amai asenok mozü kidang inyakertemi temulung magütsü aser mozü kidang meinyakertemia tashi manga ta alidang Covid wara tesashiba jagi menepdaksü nungbo, asenok mozü kiji molumi asütsü aser asen kiji leper akümtsü. Iba amaji matalokdaksütsübjabi mozü kidang inyakertemi bendanga agüja inyaksüla aser administration den yimten aser arogo lenirtemi akok tashi shisalemtepa nübortem anitsüla. Tang ama tashidak wara nokdangba mapa ya bilemdangdi süra, shitakba nungbo mozü kidang inyakertem ya tongpang wajak nung nokdakertem (front liners) masü saka nübortemang wajak nung nokdakertem (front liners) lir, kechiyong mozü kidangjibo tashidak nokdangtsüba masü saka tashidak nem nempoka aiddaktsür külen taneptsü atema inyaksüba dang lir. Aji oda, tashidak nempoka maitdaksütsüsa inyaksübjabi, wajak nung nokdaker, nübortem dak dang keta lir, anungji tashidak memenatsüsa kechisa medical nung mongintemi ashir aji angatsüla aser nungdak nungbo tashidak tsübu melii mask aser glove agir yariteptsüla. Aji oda, menüngdakba nung akhi ama kazülongzüa mesenzütsü, lokti madenshi aremtsü, machi majemtsü machi majem aremtsü aser mozü kidang inyaker o meinyaker na nungdak ajak nung ajungshitepa yariteptsü ta süra alima nung Covid mesen aliyonga asenok dakbo mamongtsü.

OLEMSABANG

INDIA KIN AJAK HINDU YIMSÜSÜBA KÜBOK LIDAKTSÜTSÜ TASA METETBA

- Dr. Meyu Changkiri (Shillong)

North East Christian University (NECU) aser Yanglushidi Sensaksem Sabang (YSS) longjemer Webinar sentong ka June 14, 2021 nung liasü. India lima nung kin ajak Hindu yimsütsüba kübok lidaktsütsü tasa metettsü merangba indang onük nung olemsatepba liasü (Understanding the politics of religious nationalism in India). Tongti O jembir Rev. Vijayesh Lal liasü; pa Evangelical Fellowship of India nung General Secretary lir. Aser iba Webinar nung Moderator Rev. Wati Longkümer liasü; pa India Missions Association nung General Secretary lir.

India nung pei kin ayak jangja ayutsü nükjidong nung ajemdaker temelenshi jenti adokba ya, tongtipangsa 1920s nungi balaka jangjaa meteteta arur. Sangh Parivar ajanga item otsü zülushitsü merangba, item tasa balala ya tanü alimai meteta arur. Aser parnoki India lima rangben Hindu yimsütsüba kübok ayutsü merangba, aser iba ama yimsü ka kübok lidaktsütsü merangba (Religious Nationalism) ya metettsü kanga dang tongtipang. Religious Nationalism ya anasü agi sadangtsü akok: yimsü ka politize asüba, aser yimsü ka ajanga politics aniba. Aser iba ya India nung dang masü saka alima tesem aika nung angutsü, tatishitsü agi, USA, Turkey, Western Europe, Latin America, post-Soviet states, Indonesia, Phillipines aser Pakistan amala.

Vedic Age nungi iba ya India nung amshia aruba tangatetba ka lir. Iba ya Brahminical Vedic Tradition nung yimli jagi yimsü kümzüka ayutsü merangba aser yimsü lenirtemi yimlij wazüka ayutsü merangba yimya ka lir. Tanü tashi iba shisatsü ajanga India nung yimsüba aser yimsü teloktep aiben mepilateter. Hindu yimsü aser Indian Politics loktepba amshiba ya aiben India yimsütsüba nung adoka angur. Tongtipangsa, 1990s nungi India nung iba tangatetba aser maparen ya sashia adoka angutsü. Aser iba ya India limaji Hindu yimli (Hindu Rashtra) ta angatetba nungi ya adok. Yamaji, Hindu Nationalism tangatetba ajanga Hinduismji yimsü ajak rongnung mezüngbuba aser tulutiba yimsü ka ta sayur. Tangartem ajak Hindu yimsü kübok second-class citizen ama parnoki angateter. Nungdakra, tanga yimsü nung amangertemjia tashiyim amshia Hindu kumdaktsütsü merangtsüla ta parnoki inyaker. Aser yamaji, India lima nung Hindu yimli (Hindu Rashtra) ka yangerteta Hindu yimsütsü (Hindu Theocracy) kati yimsü asütsüla ta parnoki angateta meranga inyaker, tatishitsü agi, Yogi Adityanath, Vishwa Hindu Parishad (VHP).

Iba Hindutva tangatetba aser tasa ya aiben India nung Khristantemi angatettsü memerang. Aiben Hindutva aser Hinduism tena tebandang makai aibelena angatet. Anungji India nung tongtipang tatalokba mapang nung Khristantemi shilem tajung aika magiteti aruogo. Tanü India nung "Farmers Protest," Article 370, Citizenship Amendment Act, National Register of Citizens, National Population Register, Demonitization, GST, Unemployment, Underemployment, pandemic, "sliding rupee," "crony capitalism," aser yamala mesükba onüktem aika ajanga nübortem kangshir. Iba denji külemi, India nung Religious Nationalist ajanga Media House amshia parnok mapa aser tenüng merüka sayutsü meranger. Item onüktem Khristantemi kanga junga meteta alitsü nungdaker aser nübör dak mapetba mapadong anema nokdaksüla. Tangar civil society balala nung dena lokti ajungtsü külemi nokdaksüla.

Ano Covid wara aser pandemic tia ajanga lokti nung tebandang aser tepila aika adokdaksüogo. Takar aser sensaker tetsüngda (Rich versus poor), jila nung alir aser yimtsüng nung alir tetsüngda (urban versus rural), high caste versus Dalit & Tribals. India nung Religious Nationalism sashia ainba shia item tebilemstütem tiemba züiner. Iba den külemi India nung urbanization sashia züinba ajanga lokti nung nübortem atema timtem aika bener arutsüdaki. Linük nung Religious Nationalism ali tashi item timtem tiemba akümtsü. Kechiyong parnoki machinery aliba ajak amshia Religious Nationalismi mulungba ama bilemstü, jembitsü aser inyaksü nübortem tekolok shisatsü nung enoktsür.

Anungji, akokba leman ajak nungi arogo aser Khristantem dang item tebilemstütem angateta ashitsüla. Tila tanurtem aser lanurtem dang Indian Constitution, Hindutva aser yamala onüktem rateta sayutsüla. Item onüktem ya jangjaa lira, Religious Nationalism tashidak nungi jenbua litettsü. Ibajagi nübör jenti yaritettsü, aser lokti tejakleni aotsü. Arogoi akok tashi lokti tentet balala den (civil societies) yaritepba alitsü merangtsüla. Kechiyong iba Hindutva Ideology ya tanga kecha agia masü saka Hinduism ajanga dang koktettsü. Aser iba ya koktettsü asoshi India telungtet nungi adoktsüla.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**



Mokokchung, June 18, 2021: Hokolbarnü Mokokchung nung Ao Naga Choir, Delhi-i District Task Force, Mokokchung nem Covid-Relief agütsüba mapang tangokba noksa nung angur. Covid-Relief osettem rongnung Oxygen Concentrators, Pulse Oximeters, N95 Masks, Thermal Scanners, PP Gowns aser Nebulizers densema lir. Mokokchung District Administration aser District Task Force-i nungdakba mapang ka nung tenla anguba atema parnok dang pelaba lemsatepogo. Noksa nung Ao Naga Choir, Delhi nungi züngsem asem den Mokokchung DC, Limawabang Jamir leniba nung ketdangsertem aser Mokokchung Town Baptist Arogo nungi tenzükertem angur.

Boko Haram teloki apuba pastor ka ita 8 sülen chiokogo

June 20, 2021: Kiralongrar telok Boko Haram-i Church of Christ in Nations (COCIN) nungi pastor, Rev. Polycarp Zongo apuba sülen ita ti lir tan hopta chiokogo; yaküm October 19 nü Boko Haram telok-Islamic State West Africa Province (ISWAP)-i pastor Zongo pua liasü.

Yaküm pa apuba sülen video ka ajanga pastor-i sorkar dang pa chioktsü atema tiyongtsüü aita inyakdaktüner, ta mepishia liasü.

Governor Simon Lalong, state Sen. I.D. Gyang, Christian Association of Nigeria (CAN) aser COCIN dang teyari meshia pai, "Hombarnü, October 19, 2020 ni Arogo

mongdang ka nung adentsü atema Gombe-i aoba mapang nung onoki Caliphate züngsemtem ajuru aser parnoki ni puogo; tang ni parnok ket nung lir," ta metetdakja liasü.

Paisa, "Kü den tetsür ana densema pua lir. Onok chioktsü atema akokba tashi meranga inyakdaktüner ta ni nenok dang mepishir," ta metetdaktü.

Osangbener den jembidang Kalthum Foundation for Peace nung Executive Director, Bulama Mohammed-i, "Pastor chioktsü atema pa apurtemi akhangba ama sen magütsü. Iba osangji par kibong aser Arogo nungia jangjatsü," ta metetdaktü.

West Africa nung, talisa

Nigeria nung Islamic telok balalai Khristantem anema inyakba kanga bulua kümogo. Boko Haram, Fulani telungpur aser ISWAP kiralongrartem Khristan meyrjang aika tepsetogo aser aika jenshiogo.

Nigeria nung dang masü saka West Africa tesem aika nung nisung puer oa nisung melen sen meshiba ya kanga bulua ataloker. Prangprong amertem bendangertem dang masü saka lisopurtema puer aoer aser sen meyrjang aika agütsüba sülen ang chioker.

Tamalen missionary Jeffrey Woodke aser putir Pier Luigi Maccalli nata telok kati puer oa liasü aser küm ana sülen ang Macalli bo chiok.

Khristan kulizüng agia kibong akümertem jangratatamba alir

June 20, 2021: Tanga yimsü amanger kibongtem dang nungibo Khristan kulizüng agia kiyimer kibongtem tepelaba alir, ta Barna study tasen ka ajanga bushitetogo.

United States nung iba survey nung shilem agir tain 1,500 nungi shilem 59-i, parnok kibong kümer melung süa alir, ta ashi. Iba survey nung shilem agir Khristantembo shilem 73-i

kibong kümer kanga melungsüa jangratema alir, ta ashi.

Kasa study ajangasa, tetsürtem dang nungibo teburtem timbai kibong kümer jangratema alir ta ashi. Tebur shilem 65 aser tetsür shilem 52-i parnok kibong kümer jangratema alir, ta langzü.

Yaküm research ka ajanga Institute for Family Studies (IFS)-i, America nung lanur

aikati kibong akümtsü mejangrar, ta bushiteta liasü.

Lanurtemi kibong mekümnüba kanga bulua kümogo aser arrshi küm 25-50 tsüngdapur shilem 35 dak tema kibong maküm, ta kasa study ajanga bushitet.

Tamalen, 1970 küm nungbo America nung arrshi küm 25-50 tsüngdapur shilem 9 dang kibong mekümi liasü.

Iran election nung Raisi-i takok anguba sülen Khristantem shisabulur

June 20, 2021: Iran linük Tir election nung Ebrahim Raisi-i takok anguba sülen iba linük nung Khristantem tarutsü atema tsüba bilemer.

Iran election nung Raisi-i takok ngura linük nung minority Khristantem akoksatsü, ta bilema Khristantem aikati vote magütsü.

Raisi ya Iran nung tongti judge lir aser taoba mapang nung yimtenren tsütsü tepuokdak alir aika tepseta indokba ajanga US-i pa anema

inyaker.

Election jakdang osangbener den jembidang Khristan charity telok-Article18 nung advocacy director, Mansour Borji-i, "Raisi-i takok ngura Khristantem taliba reshikanghsitsü aser temeden aika agentsü. Linük nung international meimchir temeden balala aser religious freedom anema inyakba kanga bulua kümogo," ta metetdaktü.

Tir menden nungi anisüngzüker, Hassan Rouhani-

i election jakdang pai election nung takok ngura pai Khristantem densema religious minorities-i akhangba ataloktsütsü, ta nangzüka liasü. Ajisüaka pa Tir inyakba mapang nunga Khristantem kanga reshikangshiogo.

Mansour Borji-i, "Rouhani kübok Khristantem aser tanga minority telok balala reshikangshiba kanga bulua aküm, aser tang Raisi yimsüsüba kübok ano tamajungba akümtsü," ta metetdaktü.

ANO GO ABEN TSÜNGREM DEN

Temeshiba asoshi ne sasa angazükang

Saka memeshi aser tantsür tar nunger otsü tagi. Aser ne sasa temeshiba asoshi meranga inyakang. 1 Timoti 4:7

Laishiba ajunga nung Tsüngremi asenok dang meinyaktsü indang dang ashir masü saka paidoktsü indanga ashir. Pauli Timothy Yisu Khrista tenzüker tajung ka akümtsü, tamang O agi maneni mesütsü ashi. Ano kechi meinyaktsüla iba indanga ashi. Tar nunger otsü nungi pilaa alitsü indang ashi. Alima otsü nungi talangka pilaa liang. Alima otsüji temeshiba den meputep. Tiyazü tesayurtemi nisung shisatsü aser tiyazü tesayuba bener arur koba agi shirnoki iba atema mita alir, parnok dak tanelaren lendong adokdaktür. Pauli aji paidokang ta ashi. Temeshiba akümtsü asoshi ne sasa azüokang.

Tsüngrem mulungsentsü teindangji temeshiba lir. Temulung asüba den iba temeshibaii tajangzük tulu agütsür (1 Timothy 6:6). Ibai tamanger ajaki aginür. Saisapongeri tazüokba Oji amshir. Tasemtepba nung takok angutsü asoshi saisapongertem iba tazüokba parnok sasa alir. Ibai metetta telemtetba agiba lir. Tanü asenok asoshi Khristan taküm ajaba tasemtepba nung takok ngunüra asenoki tejangja telemtetba agitsüla. Asenoki asen kolok aser temang Tsüngremi amshitsüsa azüoktsüla aser angazüktsüla.

Asenoki ya koda inyaktsü? Asenoki mokrema Tsüngrem den mapang agitsüla, Khrista asoshi sarasadem nokinketer ka akümtsüla, Tsüngrem O nung mapang indokba ajanga, azüngba, shisadangba, bushiba aser temulung agi angazükba ajanga asenoki ya inyaktet. Tanü iba Telemtetbaji agiang aser anogo shia aji amshiang.

Kü Kibur, Khristan ka ama mapa lidaktüner ta ni metet aser tanü ni Na anasa kümdanga jajadakjang. Amen.

Bangladesh-i linük yimsü Islam shimba anema aikati longkak ait

June 20, 2021: Bangladesh-i yimsü ka kija sangdongtsü linük yimsü Islam sangdongba makok. Onoki ibaji magizüker," anema taoba hopta Bangladesh ta metetdaktü.

nung minorities- Hindu nunger, "Linük temzüng nungbo Khristantem aser Buddhist Bangladesh ya secular linük ka, nungertem longjemer "Black ta sangdonga lir. Ajisüaka linük Day" sangdonga longkak yimsüji Islam ta sangdonger. aitogo, ta International Iba nungji tashishitsü keta lir. Christian Concern (ICC)-i Yamai dang ora Islam yimsü metetdaktü. züintsü aser yimsü tsütsü

Küm shia June 9 nü tesempa nung ajemdaker Bangladesh nung Hindu timtem aika adoktsü," ta paisa nung, Khristantem aser metetdaktü.

Buddhist nungertem Bangladesh nung Bangladesh yimsü Islam Khristantem densema minority sangdongba anema longkak yimsütem kanga reshikangshir, aita arudar. aser bendanga züngshir, aser

1988 küm June 9 nü ibaji ajanga minority temi linük Bangladesh-i linük temzüng nung minority commission ka kubok 8th amendment agizüka tentetsü akhanger. linük yimsü Islam shima liasü, Osangbener den jembidang aser iba ozüng anema küm shia Bangladesh Hindu Buddhist minorities-i longjemer longkak Christian Unity Council nung aiter. Secretary General, Rana

Osangbener den jembidang Khristan lenir, Nirmol Rosario-i, "Iba ozüng yangluba ajanga Dasgupta-i, "Majority (Muslim) yimtenren nung telemsa teloki minority tem kanga metsüh proktsüogo. Hindu, ka aser religious communities commission ka tentetsü onoki aliba linük ka nung linük atema akhanger," ta metetdaktü.

OLONG PAITEP # 5851

1			2			3		4		
					5					
		6								
							7			
		8								
9										10
					11	12				
13										
14						15				

TIPILEN		LANGTSÜNGLEN	
1. Chiyungtsü oksa	- (5)	1. An tetsü	- (5)
3. Tatalokbatem	- (5)	2. Juzüa senzüba shiruru	- (7)
5. Tama	- (6)	3. Tamendakdak	- (4)
6. Pei meyong aküm	- (3)	4. Tiak-asang	- (6)
7. _ _ _ _ bang	- (4)	7. Tasa	- (7)
8. Kinungpurtem	- (7)	8. Süngjang telung nung aliba	- (6)
9. Nokdak masü	- (4)	10. Ibai masü	- (5)
12. _ _ _ _ la	- (3)	11. Ano mamen	- (4)
13. Ochi masü	- (6)		
14. Yagi Sü ataker	- (5)		
15. Temadok	- (5)		

OLONG PAITEP # 5850 TELANGZÜBA

TIPILEN :		LANGTSÜNGLEN :	
1. Semtu, 3. Lepko, 5. Bilem, 8. Ulu,		1. Sayu, 2. Teb, 4. Kimong, 6. Lungkak,	
10. Tsünpang, 11. Tesangwa,		7. Milak, 9. Zünga, 10. Temopu,	
13. Aoksa, 15. Putir, 16. Yipru.		12. Walu, 14. Ali.	



REVEREND-BAI LANURTEM METONGSHITSÜR :

Reverend : Lanurtem... Nenoki sentep nung menden/sentong lenir shilem agidang temetongshitsü ajitetba kar metongshitsüdi.

1. Akümtsüba aliba Pastor Rev. Alokba ta mashi yongjia...tatsüba agi 'Akümtsüba aliba Pastor'...ta dang shiang...Pastor-baji tangalen alir aeiner ka masü asen Pastor-ba... arogopur ajaki pa meteta dang lir.
2. Ken atentsü atema Ken No. ashidang... Ken Züngdangba - Number ta mashitsüla...Züngdangba & Number anaji kasa.... Anungji Ken No. paikaji tendi ta...mesura Ken züngdangba paikaji tendi ta dang shiang.
3. Program zünga ashidang ...tatempang nung " Iba sentong asoshi ajaki sarasadema atadi"...ta aliba oren-jibo mazüngtsüla...Kechiba sura tanü sentongji agitetsüba atema züluba dang ...joko aji tonga arur tanu agir.

Lanur-tem : Ayyyyyaaaa...Reverend-ba...Kanga dang pelar-a nooo...Tang nungi-bo onoki yamaji metongshia agitsü merangdi.

Lilir : L.Kika Pongener.

TANÜBO NAI LANGZÜANG

Q. ESA ajanga renemba Wood satellite ya ____ lir.
A.Nanosatellite B.Microsatellite C.Mini satellite D.None

_____ (Taruba adok nung onoki langzüsü)

YASHI ADOK TELANGZÜBA : Bihar

AO OSHI ANGAZÜKDAK:
TANÜ ANGAZÜKTSÜBA OJANG

Kao
 (v) kidangi aiba / tai tonglokba (enter into a house / fall upon a lot)
 * Kübu sülen ni kidangi **kao**.
 * Yona dak rong nung alir timtemba taiji **kao**.

NAI-A YA METETTER MA?



Hyderabad nungi arishi küm 3 tain Ayaansh Gupta dak Spinal Muscular Atrophy (SMA) ta nungja agütsüba timtem balaka lir. Gupta dak aliba timtem anepalutsü atema 'Zolgensma' injection ka nungdaker aser iba injection jenjang sen cr. 16 lir. Nisung 65,000 agi tenla agütsüba ajanga, Gupta nem iba injection agütsüogo. Alima nung jenjang tasaktiba mozü rongnung 'Zolgensma' alitsü aser rongsen tenla ajanga US nungi iba mozü aliteta liasü; aser Bodhbarnü (09.06.2021) Secunderabad kübok Rainbow Children's Hospital nung Ayaansh nem iba injection agütsü. Ayaansh tsürabur Yogesh Gupta aser Rupal Gupta nati taküm February ita tetenzüklen 'ImpactGuru.com' sabang nung 'crowdfunding campaign' mapatong ka tenzüktsüba ajanga iba mozü alitetsü asoshi senotsü bendentet. Film industry nung tongtimbang nisung, Production aser mozü company temi senotsü teyari agüja liasü. SMA ya progressive neuromuscular tashidak ka lir, koba SMN1 gene nung tashimaitba ajanga adokdaksür.

SUDOKU # 5892 **TELANGZÜBA # 5891**

7	9		8	2	1		5	6	9	5	7	6	1	3	8	2	4
			4	9					2	4	8	7	5	9	3	1	6
			1	5			9	7	1	3	6	8	4	2	9	5	7
			7		9	5			3	6	2	4	8	1	5	7	9
4							7	9	7	9	5	3	2	6	4	8	1
	2			5		6	4	8	8	1	4	5	9	7	2	6	3
1						7	9		5	2	1	9	7	4	6	3	8
	7		4	9			3	2	6	8	9	1	3	5	7	4	2
5		9	2	1	7	8	6	4	4	7	3	2	6	8	1	9	5

OJANG LUTEP # 5436

NGATARI :

MNGBULUA :

UNNG :

ANKODG :

JADJAIR :

IPE :

ASSA :

MUTETLUNGBA :

CHKEA :

KAMAR :

OJANG LUTEP TELANGZÜBA # 5435

TELOK NUNG KAR KÜMZÜKA YUNÜDANG TATEM NUNGBO AJUNGA NÜNGSEN AGI

TAN HOPTA ATEMA - KOMA SÜLA ?

Q. Food & Civil Supply department nungi Relief jang ya magütsü anen nunga koma süla ?



June 20, 2021 nü Karnataka nung coronavirus anema tenokdangbatem agienba sülen Bengaluru nung state road transport bus ka nung mozü-tzü ainba noksa nung angur.

Tanü nungi linük nung tain ajak nem vaccine angati agütsütsü

New Delhi, June 20 (Agencies): India nung Covid-19 vaccination mapatong tasenba June 21 nungi tenzüka linük nung tain ajak nem coronavirus vaccine angati agütsütsü.

Tan ita tetenzüklen Ato kilonser, Narendra Modi-i, Centre-i Covid vaccination drive inyakyim ajak ketdangüsü, ta metetdakja liasü.

Supreme Court-i, tang arrshi küm 18-44 tsüngdapurtem vaccination drive agi melung mesüi Centre arrtsüba sülen sorkari vaccination inyakyim tasenba tenzüksü.

Centre sorkari arrshi küm 18 ser temapurtem atema state ajak nem vaccine angati agütsütsü; Centre-i coronavirus vaccine yanglurtem dang nungi vaccine shilem 75 alizüksü aser ibaji state tem nem angati lema agütsütsü.

State aikati arrshi küm 18-44 tsüngdapurtem nem vaccine agütsü tenzükgogo, aser maneni June 21 nungi tenzüka sorkar facilities nung arrshi küm 18 ser temapurtem nem vaccine angati agütsütsü.

State shia nung nütsüng, shirangertem aser vaccination jenjang asadanger state/UTs nem Centre-i vaccine

lemzüksütsü.

Nija hospital temi maneni vaccine yanglurtem dang nungi vaccine shilem 25 alizüksü akoktsü aser nija hospital temi vaccine dose shia nung sen 150 tashi dang meshitsü.

Centre-i vaccine angati agütsüyonga state sorkartemi vaccination maparen achaayangtsü.

Sorkar vaccination centers aser nija vaccination centers ajak nung onsite registration facility agütsütsü, aser iba facility ji nija aser telok naprongla nem agütsütsü aser iba inyakyimji state/UTs-i pei sasep nung renemtsü.

India nung Covid agi nisung 3,85,000 dak tema süogo: Centre

New Delhi, June 20 (Agencies): Amongnü Central sorkari affidavit ka ajanga Supreme Court dang, linük nung Covid-19 wara ajanga nisung 3,85,000 dak tema süogo, aser iba dang nungjagi timba akümtsüa akok, ta metetdaksü.

Lawyers- Reepak Kansal aser Gaurav Bansal nati temepishiba shidi ka ajanga Supreme Court dang, coronavirus wara mapang nung asür kinüngertem nem senotsü teyari lakh pezüzü agütsütsü atema Centre sorkar densema tim ketdangsertem dang tuyuang, ta mepishiba dak sendakba ken o angadanga sülen SC-i Centre nem notice ka agütsü.

Centre sorkari affidavit ka ajanga telangzüba agütsüdang Supreme Court dang, "Covid-19 wara ajanga linük nung nisung

3,85,000 dak tema süogo, aser iba dang nungjagi timba asütsüa akok," ta metetdaksü.

Taoba mapang wara balala agi asüba dang nungi tang wara nung nisung timba asü, ta shia Centre-i, "Nisung jenti asüba ajanga takar, sensaker, mongintem, informal sector nung inyakerterem, shishilembartem aser aluyimertem aika kongshiogo. Sorkari nungdakba teyari agütsütsüla ta meteta lir, ajisüaka asürtem atema dang teyari agütsütsüji tim masü," ta ashi.

"Ita aser küm aika- mapang talangka mesamaba tang ama tashidak atema senotsü teyari agütsüba yimya tenteta mali," ta Centre-i metetdaksü.

"Tashidak ka ajanga asürtem nem teyari agütsür tanga tashidak agi asürtem nem teyari magütsüra ibajibo

bendangshidangba lir. Tzümetsüng, menoknok aser cyclone lendong ama masü saka tang Covid-19 wara mapang nungbo Centre aser state sorkartemi wara nokdangtsü, tashidak tendangtsü, treatment, quarantine, hospital nung amongba, mozü aser vaccination nung sen crore aika indokogo aser maneni indokdar," ta affidavit nung shia lir.

"Covid wave tasen nokdangtsü aser renemshitsü atema Centre aser state sorkartemi akokba tashi mera agia inyakdar. Anungji temepishiba ken o agütsürtemi coronavirus agi shiranga asür kinüngertem nem senotsü teyari agüjang ta mepishibaji state sorkartem senpong agi makoktsü," ta Centre sorkarisa metetdaksü.

Jammu & Kashmir nem state jenjang agütsütsüla: Congress

New Delhi, Aami/June 20 (Agencies): June 24, 2021 nü Centre sorkari Jammu & Kashmir nung regional party balala nungi lenirtem den senden amentsü lia Amongnü Congress party-i, Centre sorkari Jammu & Kashmir nem jenjang agütsütsüla aser assembly election agütsütsüla, ta metetdaksü.

June 24 nü Ato kilonser, Narendra Modi leniba nung Central lenirtemi Jammu & Kashmir nung lenirtem den yimtenren atema senden amentsü.

Ajisiaka Congress otongdar, Randeep Surjewala-i June 24 nü senden nungji party lenirtema adentsü asü madentsüar memetetdaksü.

2019 küm August 6 nü Congress Working Committee (CWC)-i bangzüng ka renemba lephsia, Jammu & Kashmir nem state jenjang agütsütsüla, ta takhangba asütsü.

Amongnü osangbenertem den jembidang Surjewala-i, "Iba ya democracy anema inyakba

lir aser linük temzüng alema lir," ta ashi.

June 24 nü New Delhi nung Ato kilonser Modi'er kidang ayongzükgba senden nung adentsü atema J&K nung yimtenren lenir 14 bo jaokogo, aser parnok rongnung taoba mapang J&K Chief Minister pezü densema lir. Iba senden nungji Jammu & Kashmir nung assembly elections agütsütsü atema-a jembitsü imlar.

Surjewala-i, J&K nem state jenjang agüja elections agütsütsüla, koba ajanga nüburtemi lenirtem shimetetsü aser Delhi nungi masü saka peisasa yimsütsütsü, ta metetdaksü.

June 24 senden nung adentsü atema PDP pur political affairs committee (PAC)-i party tongti lenir, Mehbooba Mufti nem temelaba agütsüiogo.

Brihostibarnü J&K nung party aikati akümba teloktep People's Alliance for Gupkar Declaration (PAGD) senden mena Ato kilonseri jaokba senden nung adentsü atema o lemteptsü.



June 20, 2021 nü Ranchi nung aliba Birsa Munda International Airport nung tayimtsü nung senzürtem dang taila RT-PCR test negative report ayokba atema police-i Mohammad Ali aser Mohammad Nasim na pua aliba noksa nung angur.

Stakeholders den jembitepa social media temzüng yanglu: India

New Delhi, Aami/June 20 (Agencies): June 11, 2021 nü UN nung Special Procedures Branch, Human Rights Council-i shidi ka ajanga India sorkar dang IT Rules, 2021 tasen yangluba atema tebilemstü akaba onük lemsatepa liasü, aser iba dak sendakba nung India sorkari UN dang, linük nung stakeholders ajak den jembiteper sülen ang social media dak sendakba temzüng tasen yangluogo, ta metetdaksü.

UN nung India nung permanent mission-i, India nung IT rules tasenba ya social media amshirtem nem tashi agütsütsü atema yanglu, aser 2018 küm sorkari lokti tentet balala aser stakeholders den jembiteper ang yanglu, ta metetdaksü.

"Permanent Mission of India-i ya metetdaksür- MeitY & Information & Broadcasting Ministry-i 2018 küm nija, lokti

tentettem aser industry associations densema stakeholders den jembitepa sülen ang draft temzüngtem yanglua liasü," ta Amongnü ministry of electronics & information technology (MeitY)-i sangdong ka ajanga metetdaksü.

Kasa sangdong ajanga ministry-isa, "Permanent Mission of India-i ya metetdaksür, India nung democratic inyakyimji ajaki junga meteta lir. India linük temzüng nung pei tebilemba lemsateptsü temeden agüja lir. India nung democratic inyakyim nung Independent judiciary aser media shilem lir," ta metetdaksü.

June 11 nü UN rapporteurs-i, India nung Information Technology (Intermediary Guidelines and Digital Media Ethics Code) Rules, 2021 ya International meimchir temeden telatetbatem den meputeper, ta metetdakja liasü.



Patna, June 20, 2021: India nung petrol aser diesel jenjang maneni atuba anema Amongnü Bihar yimtiba, Patna nung Jan Adhikar Party pusemertemi longkak aitba noksa nung angur.

Brazil nung COVID agi asür nisung 500,000 alemogo

Brasilia, Aami/June 20 (Agencies): Linük nung COVID-19 agi asür nisung 500,000 alemogo aser Tir Jair Bolsonaro-i tashidak wara junga ketdang masüba mechi pa anema Brazil tesem ajunga nung nüburtemi longkak ait tenzükogo.

Longkak aiter temi nisung onsara asüba atema ketdangsür aitsü aser tir anentsütsü akhang.

Brazil nung COVID-19 cases tejangja 17,883,750 aliba nungi nisung 500,800 süogo, ta Honibarnü health ministry data ajanga sayu, koba United States sülen ketdangsürtemi nisung asüba züngdangba rongnung tamajungtiba alitsü.

Taoba hopta Brazil nung anogoshi nisung 2,000 shi asü. Brazil nung shilem 11 shi COVID-19 mozü doses ajunga agiogo aser shilem 29 shi dose mezüngbuba agir lir, ta health ministry indang data ajanga sayur.

Iba region meketa aliba linük tem nung COVID-19 ya tang tashi kanga sashia lir, aser taoba hopta Americas nung nisung tasen million 1.1 dak COVID-19 ya putet aser kasa tashidak agi nisung 31,000 asü. Mexico state trok, Belize, Guatemala, Panama aser Caribbean nung tesem kar nung coronavirus kanga sashia lir, ta PAHO ajanga ashi.

Colombia nung COVID-19 tensa tamajungba majuru, saka yimti tulutem nung intensive care unit yiptem tem süngogo, ta PAHO ajanga tekumdangtsü shia liasü.

Brazil nung coronavirus agi nisung asüba ya iba dang nungi ano kanga agi timba akumtsü amai mongintemi ajiteter.

"Mozü agiba ajanga mapa inyak metenzükdang nisung asüba ya 700,000 mesüra

800,000 ajungtsü amai bilemer," ta taoba mapang Brazilian health regulator Anvisa nung tekolakba inyaka alisang Gonzalo Vecina-i osangbener dang ashi.

"Coronavirus tabu tasen aruba tang asenoki ajangshir aser Indian variant (India nung mezüng jangjatetba) yagi asenok kechi ang mesayangi kumdaktsütsü," ta pai tarutsü nung nisung tali asütsü indang ashi.

Vecina-i far-right telok nungi Tir Jair Bolsonaro-i tashidak wara junga ketdang masüba aitsü, shibai linük ajunga lungjemer iba tashidak wara den raratsü asoshi temolung magütsür, mozü, lockdown aser mask agiba nung temolung malemer.

Taoba mapang mozü alitsü maongka süydaktsüba atema sorkar kanga sashia aitsü. Taoba küm August aser November ita tsüngta mozü alitsü atema maongka agütsüba nung sorkari telangzüba kecha magütsü, ta mozü yangluba company, Pfizer-i ashi.

Bolsonaro-i mozü kera malizükba, social distancing yimya aser mask agiba anema nokdakba atema Honibarnü longkak aiter temi aija liasü.

Nikongdang tashinung yimti 44 aser state 20 nung longkak aita liasü, ta osang ajanga ashi. Longkak aiter temi Bolsonaro tir menden nungi agienang ta zülua amer yimyim ayima aser asem tema jaja liasü.

COVID-19 anepalutsü atema kuli tejangja maliba yimyatem nung temolung agütsüdang mozü alitsü maparen menudaktsüba, aser Bolsonaro administration ajanga tashidak wara atema inyaksangshiba asoshi Senate committee kati bushisüngdangba mapang lir.



Kabul, Afghanistan nung nija meyong oxygen factory ka nungi tetsür kati oxygen cylinder bener aoba noksa nung angur. COVID-19 wave tasembuba tamajungba akumdang Afghanistan nung oxygen kanga kera agima odar, ta health ketdangsürtemi ashi.

US mitkar nem linük nungi Afghan nung operation magidaktsütsü: PM Khan

Islamabad, Aami/June 20 (Agencies): US sepaitem Afghanistan nungi ainshiba sülen yangji operation agitsü atema linük nung mitkar amenoka aliba tesemtem mamshidaktsütsü, ta Pakistan Ato Kilonser Imran Khan-i ashi.

HBO Axios nungi Jonathan Swan den sensaksemba mapang, Pakistan ato kilonseri iba olen ya süoka jembia aser Islamabad-i ibaji memelatsü ta ashi, koba Hombarnü sayutsü.

Telungpur nungi pila alitsü atema US-i Palistan aser region nung aliba sorkar tem den rara agi raksar aliba linük nung tarutsü nung operation agitsü atema jembiba mapang lir.

Ajisüaka Pakistan-i US dang ibaji tamakoktsü, ta metetdaktsüogo.

Central Intelligence

Agency (CIA) nem mitkartem amenoka aliba tesemtem amshidaktsütsü asoshi US media ajanga ato kilonser dang asüngdanga liasü.

"Arrotsü alema oa al-Qaeda, ISIS aser Taliban den raratsü atema yangi CIA amenoktsü asoshi Pakistan-i America sorkar dang melatsü na?" ta Swan-i asüngdang.

"Khenyongi memelatsü," ta Imran Khan-i ashi.

"Pakistan litsü nungi Afghanistan nung oa maparen balala inyaksü atema khenyongi memelatsü," ta pai ashi.

Taoba mapang Pakistan Foreign Minister Shah Mahmood Qureshi-i Afghanistan nung yimjung maparen ya linük ajak tebilemetsü aser iba maparen nungi tamajung adokba linük ka kisüng khuret masütsüla,

ta shia liasü. Afghanistan nungi America nung sepai ajunga taküm September 11 tashinung anizüker aotsü, ta US Tir Joe Biden-i April ita sangdonga liasü. North Atlantic Treaty Organization-ia sepaitem anizüker aotsü atema kasa ya sangdonga liasü, anungji Taliban aser dang telungpur telok temi region nung tawa süngdaktsütsü akok, ta bilemer.

Islamabad nung Pakistan-Afghanistan Bilateral Dialogue tenzükba mapang jembidang, par tamakok atema Afghan ketdangsürtemi mapang shia Pakistan tenüng asener, ta Qureshi-i shia liasü. Tir Ashraf Ghani-i anir Afghan lenirtemi US semdangba mapang kasaji mataloktsü imlar, ta pai shia liasü.

North Korea nung chiyongtsü agi kanga anünger

Seoul, Aami/June 20 (Agencies): North Korea nung chiyongtsü agi kanga anüngba ajanga oset balala nung jenjang aika kümogo.

NK News sangdong ka ajanga ashiba agi, mongu seret ka nung sen 3,336 meshir aser kasaji süngo talep ka nung sen

5,167 aser coffee talep ka nung sen 7,381 dak tali meshir. Mendi seret ka nung sen 204.81 agi yokdar, ta kasa sangdong ajanga metetdaktsü.

Chiyongtsü agi kanga anüngba ya COVID-19 wara poktetba ajanga linük shibanga ayuba aser alima kin balalai

tenokdangba agütsüba den tzümetsüng kanga aruba ajanga lir.

Chiyongtsü, fertilizer aser totzü atema North Korea China dak metaloker alir, saka China nungi USD billion 2.5 intoka item osettem belener arua aliba tangbo USD million 500 dang

kümogo, ta Chinese official customs data ajanga sayuogo.

Tensa kanga majungba ajanga North Korea nung aluyimertem dang fertilizer yanglutsü atema anogoshia natzü (urine) liter anana meshidar.

Kim Jong Un-ia, North Korea nung chiyongtsü agi kanga anünger ta shiogo, ta state media sangdong ka ajanga metetdaktsü, aser iba ajanga North Korea nungertem tetsübu nung lir, kong 1990s mapang ayawara tulu arua nisung meyirejang aika süogo.

Sensak tia nung aliba linük koba nuclear weapons aser ballistic missile programme tem tali ajungkettsü merangba ajanga alima kin balalai tenokdangba agütsür lir, iba linük ya mapang talangka chiyongtsü agi anüngba agi kangshia arudar.

Taoba küm coronavirus wara pokteta linük mokdanga ayuba den lemluwa mapang

yipru tesashi aser tzümetsüng aruba ajanga linük rongsenketsüng nung kanga mejungi kongshir lir.

Workers' Party of Korea central committee senden ka nung Kim-i, taküm rongsenketsüng tera tajungba kümogo aser taoba küm dang nungi industrial output shilem 25 agi timba kümogo, ta ashiba official KCNA news agency-i Bodhbarnü sangdonga liasü.

Ajisüaka tetsükdaktsü aika adokba ajanga lenla aika nung tamakok aluogo, ta North Korea leniri ashi.

"Nüburtem chiyongtsü agi anünger, kechiyong taoba küm yipru tesashi aruba ajanga agricultural sector-i chiyongtsü adokdaktsütsü sentong yanglur aliba matalok," ta Kim-i ashi.

Taoba küm lemluwa yipru tesashi aika aruba ajanga tzümetsüng adokdaktsü aser iba ajanga ki aika raksatsüba den alu aika metsüngbanga liasü.

(Maneni tapak 9 nung...)



Jerusalem nung sorkar tasenba hoptashi amenba cabinet senden Israel Ato Kilonser Naftali Bennett -i (tiyong) anir mena aliba noksa nung angur. Taoba hopta teloktep sorkar ka tentetba sülen Bennett-i pa indang Cabinet senden mezüngbuba Deobarnü tenzüktsüba mapang pai Iran nung tir tasenba aija liasü, shiba dang pai 'Aúthe hangman of Tehran' ta ajar.

'Maestro' indang shilem tatebuba tangok tenzükogo

Hyderabad, Aami/June 20, 2021 (Agencies): South superstar Nithiin indang film 30buba - Maestro, koba Merlapaka Gandhi-i direct südar, iba film indang shilem tatebuba tangok tenzükogo.

Iba film ya Ayushmann Khurrana indang Andhadhun nung ajemdaker yangludat aser June 14 nü Hyderabad nung iba shilem tangok tenzükogo. Tanabuba Covid-19 sülen, iba film ya Nithiin indang mezüing project alitsü. Sreshth Movies ajanga iba movie atema senotsü agüja yaritsü.

"Iba film indang shilem tatebuba tangokzükba den külemi, maparen ajunga

renemtsü. Iba crime comedy nung Nabha Natesh-i Nithiin den külemi shilem agiba angutsü. Tamannaah Bhatia-i Tabu shilem agitsü. Iba film indang mezüing poster aser teaser ka Nithiin asoba anogo nung lemsatep aser fans temi telengzuba tajung agütsüogo.

Actress, Tamannaah-i la nem lemsatütsüba shilem dak sendakba nung jembiba mapang, "Ni Tabu indang maparen kanga sapur aser lai inyakba mapa ka tanaben inyaksü maangka anguba ya konang ama lir. Iba film (Andhadhun) indang script aser screenplay kanga meimer. Film nung nisung tamajung mesüra

tajung shinga mali," ta lai lemsatepa liasü.

Bheesha atema kensep tajung adoktsüsang, Mahati Swara Sagar-i tanaben Nithiin den longjemer inyaksü. Shreshth Movies Banner kübok N Sudhakar Reddy aser Nikitha Reddy nati iba film atema producer inyaksü. Kasa mapang, Rajkumar Akella-i presenter shilem agiba den J Yuvraj-i film atema cinematography tsütsü yariogo.

Iba film nung Naresh, Jishhusen Gupta, Sreemukhi, Ananya, Harshavardhan, Rachha Ravi, Mangli aser Srinivas Reddy nungeri shilem agiba angutsü.

Tahira Kashyap-i 'The 7 Sins of Being a Mother' sangdongogo



nüingja..... THE 7 SINS OF BEING A MOTHER!! lir."

Ekta Kapoor, Yami Gautam, Pragma Kapoor aser Neeti Mohan densema tongtibang nisung aikati iba kaket tasenba dak sendakba nung telangzuba tajung agütsü aser Tahira den temeim lemsatep.

Taoba küm, Tahira-i züluba kaket pezübuba - '12 Commandments of Being A Woman' sayaogo. Iba den külemi kaket azüingertemi telangzuba tajung agütsüogo.

Tahira-i lockdown mapang writer ka ama timtemba indang tawa lemsatepa liasü. Iba lockdown ajanga la tenük nung timtem balala ajangshiba lemsatepogo. 2011 küm la LASIK (a laser eye surgery) surgery agia liasü.

Tahira aser actor Ayushmann Khurrana na lanuwa mapang nungi meimtepa aru aser 2008 küm tena kibong aküm. 2012 küm tena nem jabaso - Virajveer aser 2014 küm jala Varushka moatsü.

2011 küm, Tahira-i la indang mezüing kaket - I Promise' zulu. Iba sülen lai tanabuba kaket - Souled Out zülua liasü. Laisa la kinungbo Ayushmann Khurrana indang biography - Cracking The Code: My Journey In Bollywood külemi zülugo. Short film talisa - Pinni aser Toffee na Tahira-i direct süogo.

New Delhi, Aami/June 20, 2021 (Agencies): Deobarnü, Tebutem anogomung nung, Author aser film yanglur Tahira Kashyap Khurrana-i "The 7 Sins of Being a Mother" ta agütsüba kaket nüingja tasen ka sangdongogo.

Tahira, shibai actor Ayushmann Khurrana den kibong aküm, lai Instagram ajanga la indang kaket pungobuba sangokja liasü.

Covid-19 mapang, lai züluba kaket tanabuba nüingja laptop screen nung Tahira-i sayu aser lai tepela nung pungdenba noksa ka lemsatep.

Tahira-i ashiba agi, "Ni kü kinungbo aser chirnurtem meimer, saka tanü Tebutem Anogo nung, nenok den ni züluba kaket tasenba indang tepela osang lemsatepner!! Iba kaket ya ajaki jangratema azüingtsü imlar.....iba kaket

North Korea nung chiyongtsü... (Tapak 8 nungi...)

Kim-isa, item yipru mopung aser tzümetsüing ajanga teraksatsüba bener arutsüba tajemba kümdaktsütsü atema jenjang tapet agitsü ayongzükogo aser ashiba agi, alu junga arutsüji mapa ajak dang tongtibangtiba lir.

Iba senden nungsa coronavirus wara pokteter aliba indang mapang talangka sensaksemogo, ta KCNA sangdong ajangsa metetdaksü.

Pyongyang nung medical infrastructure kanga majung aser mozü agi kanga anünger aser iba amala mapang ka nung coronavirus tashidak

poktetra timtem lendong tulu ataloktsü, ta ken o asadangertemi ashi.

Kidanger linük China nungi prokshia aoba tashidak nokdangtsü atema North Korea-i taoba küm January ita par linük arrtsü shibanga ayu.

NK nung corona tashidak pokteta mali ta shia arudar saka ken o asadangertemi temulung melemi bilemer, ajisüaka linük mokdanga ayuba ajanga rongsenketsüing nung timtem tulu adokogo.

China den shishilembaba ya North asoshi rongsenketsüing temetalokdak lir, ajisüaka linük

ana tsüingda shishilemba tajemba kümogo aser tenokdangba balala agütsür aliba ajanga alima kin balalai teyari maparen minyakteter.

Wara poktetba ajanga North nung nüburtem libaliro kanga mejungi kümogo aser nisung million 10.6 nüingdak nung lir, ta Coordination of Humanitarian Affairs (OCHA), UN Office nungi otongdar kati ashi.

North timtem nung aliba nangzuka Kim-i April ita nüburtem dang tia tensa tamajung ka ajangshia aotsü renema alitsü metetdaksüogo.

MENUNGRA BILEMTETER



TASÜBA ANOGO: 21ST JUNE 2018
ASÜR L. TEMJEN IMSONG (YAONGYIMSEN)

Temeim Oba, Tsüingrem mongpu melentepa oakasa onoki na teti menungrar. Na meliaka nü temeim aser akümlü shisa teka mapatem teti onok den lir. Na teti tatem makaba anisüingzük lima nung lir ta amanga onok mulung süngzükur.


Kinungtsü, Chirnurtem, Semchirtem aser Kinungertem.


ASTD dang pelar


Meimlaba mapang ka asen limai tulu-tila mebendangba wara Covid-19 tashidak aruagi nübor ajak timtemba ajiteta, ASTD-i Aotsür Aor asen nübor asoshi mapa tajung jenti inyakba ngua, Dimapur nung aliba Tzükong trok sanger nübor ajak tenüing nung tzükong ketdangpurtemi ASTD dang kangasa pelaba lemsateper.

- 1) Covid wara agi shiranga hospital nung amonger aser Covid agi asür nem rongsen den sarasadem shiti ajanga yaritepa arudagi.
- 2) Tashidak agi shiranga alirtem pei kidang nungi dang doctortem den tongtepratepa taneptsü angutsü leman lapoktsü.
- 3) Dimapur nung aliba Covid hospital ajak semdanga doctortem, frontline workers aser shiranga alirtem dang tamaitü ajungshia o tajung zülü kaket balala nung zülur agütsü aser o zülü kaket karbo tesem balala nung jara (wall) dak neploka yutsü.
- 4) Timtemer kibongtem nem teyari agütsü.


Asen nübor ajungtsü mapa tajung inyakbaji teti bilemtetsü Tsüingremi ASTD maneni ajungketa moajangma.



1) Terumpok Jamir
Tir, OSTD


2) S. Imlı Jamir
Tir, DAT


3) S. Watti Imchen
Tir, DTST


4) Temjentoshi
Tir, DJST


5) S.N. Meren Jamir
Tir, DLST


6) Aoyanger Imchen
Tir, JSTD

AR Rahman-i Gulzar den longjemtsü



New Delhi, Aami/June 20, 2021 (Agencies): Music wadang tsütsü nübu takotet/ mongin ana - music composer AR Rahman aser Indian lyricist Gulzar na ken ka atema longjemtsü, koba music sapurtem atema osang tajung asütsü.

Rahman aser Gulzar na longjemer atenba 'Meri Pukaar Suno' ken sayatsü terenemba lir. Sony Music India ajanga aruya aliba ken produce süogo aser parnoki Instagram sabang ajanga iba ken indang teaser ka lemsatepa liasü.

Oscar takok angur star ana ya tan longjemba ya mezüing Taoba mapang nunga ken kar atema tena longjemer inyakba ajaki jangjaa lir aser tena sempet ajanga music sapurtem nem nüngtugu soundtrack aika

yanglutsüogo.

AR Rahman aser Gulzar nati longjemer yangluba ken rongnung - Shah Rukh Khan aser Manisha Koirala nati tongti shilem agiba 'Dil Se' film nungi 'Dil Se Re', 'Chhaiyan Chhaiyan' aser 'Ae Ajnabee' ken dena lir. Ano külen, Abhishek Bachchan aser Aishwarya Rai nati tongti shilem agiba film 'Guru' nungi 'Tere Bina Beswadi' aser 'Ae Hairathi' ken alitsü. Vivek Oberoi and Rani Mukherjee nati shilem agiba 'Saathiya' film nungi 'Hasti Rahe Tu', 'Chupke Se' aser 'Halki ae Halki' dena lir. Iba den külemi 'Heer Heer' aser nüngtugu 'Jab Tak Hai Jaan' title track, kong Shah Rukh Khan aser Katrina Kaif nati tongti shilem agir aser tanga ken aika tenati mejema tenogo.

2028 Olympic atem asayar anitetsü Nagaland-i merangdar: Neikha

Kohima, Aami/June 20 (TYO): 2028 Olympics atema Naga nunger boxer, archer aser wrestler tem anitetsü atema Nagaland-i merangdar.

Khelo India mission kübok 2028 Olympics atema Indian team nung züngoksemdaktsütsü asoshi state-i lanur boxer, archer aser wrestler tem anitetsü atema takok tashi merangdar, ta Nagaland Advisor for Youth Resources and Sports, Zale Neikha-i osangbenertem den sensaksemba mapang ashi.

Khelo India Centre for Excellence kübok Nagaland-i iba asaya asem nung rangloker inyakdar, ta pai ashi.

Neikha-isa, tetsür aser tebur 20 nem Dimapur Boxing Academy nung coaching

agütsü tenzükogo, ta metetdaktsü. Senior coach, Neeta shiba tang state nung mali, la COVID-19 wara pokteter aliba ajanga state-i maruteti lir, ajisüaka lai State coach Tsunchetrenla teyari nung online virtual training agütsüdar, ta pai ashi.

Boxing Academy Dimapur ya takaratiba nung IG Stadium Kohima-i belener atutsü, koba state atema Khelo India Centre for Excellence ka kümdaktsüogo, ta Neikha-i metetdaktsü.

Archery training KICE Kohima nung agi tenzükogo ta shia pai, tebur ana aser tetsü ana ta senior archers pezü tang training tagidak lir, ta ashi.

Maneni pai ashiba agi,

Department of YRS-i local archer tem nem training agütsütsü atema 2012 Naga Olympian Chekrovolu Swuro anisemtsü atema asadangdar.

La Department dangi anir arutsü atema benokdangba Chief Minister Neiphu Rio nem agüjatokogo, ta pai ashi.

State nungi archer temi kanga junga asayaa arudar aser jenjang balala nung India tenüng nungi toktepa arudar ta shia pai, local Olympian, Swuro anisema department-i item asayartem ajungmesoner ta ashi.

Wrestling dak sendakba nung pai, state coach Chisazo Dawhuo nem Naga nunger wrestlers tem nem training agütsüdaktsütsü asoshi merangdar, ta ashi.

Barcelona-i Netherlands striker Memphis Depay alizükogo



Aami/June 20, 2021 (Agencies): Barcelona-i Honibarnü Lyon nungi free agent ka ama Netherlands striker Memphis Depay anisemogo.

Barca sangdong ka ajanga ashiba agi, arishi küm 27 tain Depay-i club nungi küm ana asayatsü atema mulunga agizükogo.

Dutch club PSV Eindhoven aser Manchester United nung asayaba sülen Depay 2017 küm January ita Lyon nung oa aden. Taoba season pai goal 20 idaktsü, koba Lyon nung asaya aruba season tem rongnung tajungtiba liasü.

Depay tang European Championship nung Netherlands nungi asayadar. Brehostibarnü Austria team 2-0 agi akokba asaya nung pai idaktsüogo.

2020-21 season tenzükdang Koeman

Barcelona nung arua maden tsüngda Depay pa kübok Netherlands team nungi asayaa liasü.

Depay densema Barcelona puri off season nung tang agi asayar pezübuba alizükogo. Taoba season nung parnoki Copa del Rey dak alaka tanga asayamung ka danga makokba sülen season tasenba asendenshir asayatsü asoshi renemshiba mapang ka lir. Sentsü euro billion 1.2 tsüa aliba ajanga Barcelona puri transfer taa paitoktsü atema free agents tem dak rangloker inyaksangshia arudar.

Manchester City den tenangzüktepa yanglur aliba tembangba sülen Sergio Aguero aser defender Eric Garcia na Barcelona nung denogo aser kasa mapang nung Brazil nunger asayar Emerson Royal, Real Betis-i loan nung yoker aliba tanaben meyipa anir aruogo.

Euro 2020: Germany-i goal 4-2 agi Portugal kokogo



Portugal den asayaba mapang Germany goal keeper Manuel Neuer-i ball nokdangba noksa nung angur.

Munich, Aami/June 20 (Agencies): European asayamung asemben tashi koker aliba Germany team taküm iba asayamung nung mezüngbuba asaya makokba sülen Honibarnü Group F asaya nung parnok Portugal team goal 4-2 agi kokogo.

Portugal team atema Cristiano Ronaldo-i minute 15buba nung mezüngbuba goal idaktsü, saka asaya mezüngbuba shilem tembangba mapang tashi nung Germany team goal 2-1 agi tejakdang liasü, kechiyong Portugal nunger asayar Ruben Dias aser Raphael Guerreiro nati parnok indang goal nung goal kaka idaktsü.

Asaya tanabuba shilem nung Germans team-i kanga junga asaya tenzükter aser Kai Havertz aser Robin Gosens nati goal kaka idakja goal 4-1 aküm, iba sülen Diogo Jota-ia Portugal atema goal ka idaktsü saka menoatoker liasü.

Iba asaya akokba sülen Germany team par telok nung tanabuba jenjang nung lir aser parnok tatemsa Hungary den asayatsü. Group F nung France

team-i point pezü nguteta parnok temaba jenjang nung lir aser Germay o Portugal nati point asemsem nguteta tanabuba jenjang nung lir.

Asaya tenzükter minute pongububa nung Germany nunger asayar Gosens-i goal ka idaktsü ajisüaka Serge Gnabry offside asüba ajanga iba goal magi.

Iba sülen mapang tatsüka lir Jota-i agütsüba ball ka Ronaldo-i züba züba idakja parnok tejakdang aküm.

Asaya nung minute 35 orr aliba mapang Gosens-i cross asüba ball ka Portugal defender Dias dak tsükdaker ai aser mapang tatsüka dang lir Kimmich-i cross asüba ball ka Guerreiro-i metsütoktsü merangba mapang par goal nung metsüoktsü.

Portugal-i, break mapang Bernardo Silva melena Renato Sanches yok saka asaya tanabuba shilem tenzükter minute trok dang lir Gosens-i agütsüba ball ka Havertz-i idakja parnok goal ana agi tejakdang aküm.

Germany team-i maneni kanga junga asaya aser Kimmich-i cross asüba ball ka

Gosens-i tekolak agi kanga junga tongokja parnok goal 4-1 agi tejakdang aküm.

Goal pezübuba agütsüba sülen Portugal team atemaa Jota-i goal ka idakja goal 4-2 nung asaya tembang.

Olympics lapokba sentong nung nisung meyrejang 20 dendaktsütsü akok

Aami/June 20, 2021 (Agencies): July 23 nü National Stadium nung Olympics lapokba sentong nung nisung meyrejang 20 dendaktsütsü atema Tokyo Olympics organising committee-i temelaba agütsütsü akok, ajisüaka item nisungtem rongnung ticket ali alirtem aser asaya ketdangsurtem densema lir.

Olympics aser Paralympics nung asaya balala reprangtsü atema fan tem nem temelaba agütsütsü asoshi Hombarnü telemteba ka agitsü.

Terpranger medeni Olympics aser Paralympics ayongzükka asayatsü atema tenongshiba kanga tali kümdar, kechiyong Covid-19 tashidak prokshia aotsü ana nung aliba kanga shisabulua bilemer aser

osang ajanga ashiba agi, asaya reprangtsüprutem atema tetuyuba karbo agütsütsü.

Kasa mapang nung Japan Chief Cabinet Secretary Katsunobu Kato-i, linük nung coronavirus tensa tamajungba kuma ora asaya reprangtsü atema nüburtem nem temelaba magütsütsü sorkari asadangdar, ta ashi.

"Coronavirus tashidak menar tali kuma ora, tenyaktü tongtibangtibaji tensa azioktsü atema inyaksangshitsü aser tanga asayamungtem ama Olympics-a kasa yimya nungdang achaayangtsü," ta Kato-i ashi.

Tokyo Olympics reprangtsü atema bendanger marudaktsütsü asoshi telemteba agitokogo.

Covid-19 tashidak prokshia aotsü ana nung aliba nokdangtsü atema Olympics ayongertemi Olympic aser Paralympic Games nung shilem agitsü aliba bendanger delegates tem ano 25,000 agi ajemshitsütsü akok.

Asayamung ayongertemi iba telemteba agira delegate tem 53,000 dang akümtsü.

Taoba ita asayamung ayongertemi delegate 180,000 arutsü imlaba nungi 78,000 dang kümstsü, koba shilem 60 dak tema ajemshitsüba liasü.

BILEMDANGANG
"Miet adokdang telemteba magitsüla."